

## Uunga allannguutissatut

## siunnersuut

**Uunga siunnersuut: Nioqutissanik eqqussuineq annissuinerlu pillugit Inatsisartut inatsisaata allangortinneqarneranik Inatsisartut inatsisaat**

Naalakkersuisut aappassaaneerinissamut saqqummiussa

**§ 1-imut**

1. § 32-p kingornanut ilanngunneqarpoq:

”§ 32 a. Akileraaruseriffik imminut aningaasartuutaanngitsumik, umiarsualiviit timmisartoqarfiillu nioqutissanik usingiaaffiusartussat usilersuiffiusartussalluunniit, imaluunniit ilaasunik nunamut niusiffiusartussat ilaasussanilluunniit ikisiffiusartussat sananeqarneranni pisatsersorneqarnerannilu immikkut ittunik piumasaqaateqarsinnaatitaavoq.

*Imm. 2.* Nunani allani sumiiffiit sumiiffiillu Kalaallit Nunaanni akitsuuteqarfiusumiittut akornanni ilaasunik angallassisarnissanik pilersitsisoqartillugu ininik pisariaqartunik atortulersugaasunik pisatsersugaasunillu, ilaasut il.il. misissorneqarnissaanni atugassiisoqarnissaa akileraaruseriffiup imminut aningaasartuutaanngitsumik peqqussutigisinnaavaa.

*Imm. 3.* Sumiiffinni nioqutissanik usilersuiffiusartuni usingiaaffiusartuniluunniit, imaluunniit ilaasunik nunamut niusiffiusartuni ilaasussanilluunniit ikisiffiusartuni akileraaruseriffik akuersiseqqaarnagu aqqutigineqarsinnaanngitsunik assersuisoqarnissaa akileraaruseriffiup imminut aningaasartuutaanngitsumik peqqussutigisinnaavaa.

*Imm. 4.* Akileraaruseriffiup pisatsersuinerit imm. 1-imiit 3-mut taaneqartut akuerissavai, pisatsersuinissamullu il.il. piumasaqaatit imm. 1-imiit 3-mut taaneqartut eqquutsinneqanngippata nioqutissanik usingiaanissaq usilersuinissarlu kiisalu inunnik nunamut niusinissaq ilaasussanilluunniit ikisinissaq itigartitsissutigisinnaallugit. Taamatuttaaq akuersissut utertinneqarsinnaavoq akuersissuteqarnermut piumasaqaataasut atuukkunnaarsimappata.

*Imm. 5.* Umiarsualivinnik timmisartoqarfinilluunniit ingerlatsinerup, sanaartorerup pisatsersuinerulluunniit allannguutaasa akileraaruseriffiup nakkutilliineranut pingaaruteqarsinnaasut akileraaruseriffimmut ilisimatitsissutigineqarnissaat umiarsualiviit timmisartoqarfiillu pi-sussaaffigaat.

Siunnersuummut oqaaseqaatit

## **Oqaaseqaatit nalinginnaasut**

Ilaatigut nunatsinni umiarsualiviit ingerlanneqarnerannik namminersortunngorsaanerup anertusiartornera, matumanilu aamma Nuummi umiarsualivimmik nutaamik selskabitut ingerlassassamik pilersaarutit pissutigalugit nioqqutissanik eqqussuineq annissuinerlu pillugit inatsimmik nutarterinissaq pisariaqartuusorineqarpoq, tassa akileraaruseriffiup pitsaasumik ilua-meersumillu nakkutilliisinnaajuarnissaa qulakkeerniarlugu.

Umiarsualivinni timmisartoqarfinnilu ininut pisatsersorneqarnerinullu, akileraaruseriffiup nioqqutissanik usingiarneqartunik usilersuunneqartunilluunniit kiisalu ilaasunik nunamut niuneqartunik ilaasussanilluunniit ikineqartunik misissuinissaani atorneqartussanut akileraaruseriffiup imminut aningaasartuutaanngitsumik piumasaqaateqarsinnaalernera allannguutissat siunnersuutip kingunerissavaa. Pisatsersuinissamat piumasaqaatit misissuinissami pisariaqartuussapput, aammalu misissuinissap siunertarisaanik eqquutsitsinissamat piumasaqaataasunit annertunerussanatik. Amerlanertigut tassaassapput sanaartukkat annertunngitsut. Assersuutigalugu inimik nassiussat ilaasulluunniit misissorneqarfigisinnaasaattut pisatsersukkamik atugassiinissaq peqqussutigineqarsinnaavoq.

Pisatsersuinernik ininillu immikkut ittunik pilersitsinernut aningaasartuutit umiarsualivinnit timmisartoqarfinnilluunniit namminernit akilernerqartussaatinnerannut tunngaviuvoq umiarsualiviit timmisartoqarfiilluunniit, akileraaruseriffimmit ilitsersorneqarlutik nammineerluinnarlutik aalajangertussaammassuk piumasaqaatit qanoq iliorlutik eqquutsissanerlugit, taannami tassaamat pisatsersuinissamik pilersaarutunik akuersisussaq pilersaarutillu eqquutsinneqarnerannik nakkutilliisussaq. Tassuunattaq qulakkeerneqassaaq aaqquissuussinernut aningaasartuutissat killilersimaarneqarnissaat, umiarsualiviimmi timmisartoqarfiilluunniit tassaammata aningaasartuutit atuisunit akilernerqarnissaannik aalajangiisussat. Aammalu oqaatigineqassaaq ininik sumiiffinnilluunniit misissuinerinnarmut atugassanik atugassiisoqarnissaata piumasari-neqarnissaa siunertaanngimmat. Init sumiiffiilluunniit akileraaruseriffiup misissuinnginnerani siunertanut allanut atorneqarsinnaasuussapput, soorlumi maanna taamaattoq. Tassa imaappoq periusioreersoq siunnersuuteqarnikkut erseqqissarniarneqarpoq. Immikkut ittunik pisoqartillugu, soorlu ininik atortorissaarutit mianersuussassat inissaannik pisatsersuisoqassatillugu taakku aalajangersimasuunissaat pisariaqarsinnaavoq.

Siunnersuutip maleruagassat Danmarkimi atuuttut annertunerpaatigut assigai, naalagaaffiup ilanngaaserinermut akileraartarnermullu oqartussaasui, imminnutaaq aningaasartuutaanngitsumik, danskit umiarsualiviini – aamma timmisartoqarfiini – ilanngaaserinermik suliaqarfiusunik sanaartornermut pisatsersuinerinermullu taakku malillugit piumasaqaateqarsinnaammata.

## Aalajangersakkanut ataasiakkaanut oqaaseqaatit

Nr. 1-imut

Siunnersuutaavoq akileraaruseriffik umiarsualivimmik piginnittumut umiarsualiviulluunniit ingerlanneqarneranut akisussaasuusumut, umiarsualiviit timmisartoqarfiillu sanaartorneqarneranni pisatsersorneqarnerannilu immikkut ittunik piumasaqaateqarsinnaassasoq, apeqqutaatinagu nioqqutissat usingiarneqarnerat usilersuunneqarnerallu imaluunniit ilaasut nunamut niuneqarnerat ilaasussallu ikineqarnerat pineqarnerat. Piumasaqaatit ininut pisatsersuinernullu misissuinissap isumagineqarnissaanut pisariaqartunut tunngasuupput, misissuinissallu siunertaanik naammassinninnissamut piumasaqaataasunit annertunerusinnaanatik. Tassunga atatilugu erseqqissarneqarpoq init akileraaruseriffiup pitsaasumik misissuinissaanut atugassat nasiusanik ilaasunilluunniit nunamut niusiffiusup angallammulluunniit ikisiffiusup eqqaaniinnissat qanittunnguaniinnissaalluunniit akileraaruseriffiup taamaallaat peqqussutigisinnaamagu. Akileraaruseriffik umiarsualivinni timmisartoqarfiniluunniit ingerlatat illuutilluunniit qanoq sanaartorneqarnissaannut pisatsersorneqarnissaannulluunniit aalajangiisuunngilaq.

Siunnersuutaavoq akileraaruseriffik ininik pisatsersuinernillu pineqartunik akuerinnittassasoq. Akileraaruseriffiup pisatsersuinernut ininullu piumasaqaatai eqquutsinneqanngippata nioqqutissanik usingiaanissaq usilersornissarlu kiisalu ilaasunik nunamut niusinissaq angallammulluunniit ikisinissaq akileraaruseriffimmit itigartitsissutigineqarsinnaavoq. Akuersinissamut piumasaqaatit atuukkunnaarpata akileraaruseriffiup akuersissutaata utertinneqarsinnaanissaa siunnersuutaavoq.

Ilutigitillugu siunnersuutaavoq umiarsualiviit timmisartoqarfiillu, matumani aamma suliffeqarfiit umiarsualivinnik timmisartoqarfinillu ingerlatsisut peqquneqassasut umiarsualivimmi timmisartoqarfimmiluunniit ingerlatsinermik, sanaartornermik pisatsersuinermilluunniit allannguinerit akileraaruseriffiup misissuinissaanut pingaaruteqartut pillugit akileraaruseriffimmut ilisimatitsissuteqartaqqullugit. Aalajangersakkatut siunnersuutigineqartup pisatsersuinerit akileraaruseriffiup misissuinissaani piumasaqaataasut pisuni, soorlu umiarsualivimmik tikitsarnerup allanngortinneqarnera umiarsualiviulluunniit allilerneqarnera pissutigalugit allanngortariaqarfiini atorneqartarnissaa siunertaavoq.